

Na osnovu člana 59. stav (1) tačka d) Zakona o visokom obrazovanju ("Sl.novine TK 8/08, 11/09 i 12/09) i člana 75. stav (1) tačka 1), a u vezi sa članom 15. Statuta Univerziteta u Tuzli, Senat Univerziteta na sjednici održanoj 28.12.2011. godine donio je

## **PRAVILNIK**

### **o izgledu i sadržaju simbola Univerziteta u Tuzli i njegovih organizacionih jedinica**

#### **I OPĆE ODREDBE**

##### **Član 1.**

Ovim Pravilnikom bliže se utvrđuju izgled i sadržaj simbola kao što su znak i zastava Univerziteta u Tuzli (dalje: Univerzitet), minimalni sadržaj znaka organizacionih jedinica Univerziteta, te način njihovog korištenja.

#### **II SADRŽAJ I IZGLED ZNAKA UNIVERZITETA**

##### **Član 2.**

Znak Univerziteta je okruglog oblika, prečnika 20 mm.

Znak Univerziteta u svom sadržaju obavezno sadrži naziv Univerziteta i njegovo sjedište, te godinu osnivanja, a koji su smješteni u vanjskom koncentričnom krugu.

Ostali sadržaj znaka Univerziteta u svojoj naravi oslikava pripadnost akademskoj zajednici.

Konačan izgled i sadržaj znaka Univerziteta utvrđuje Senat Univerziteta na osnovu prethodno odabranog idejnog rješenja njegovog izgleda i sadržaja, a na prijedlog komisije koja provodi postupak odabira idejnog rješenja putem nagradnog natječaja.

##### **Član 3.**

Univerzitet može, u svrhu svojih značajnih manifestacija privremeno, za vrijeme njihovog trajanja vršiti modifikaciju znaka, te koristiti određene adekvatne simbole.

##### **Član 4.**

Znak Univerziteta je pod punom zakonskom zaštitom, a drugi subjekti ga mogu koristiti samo po posebnom odobrenju Senata.

##### **Član 5.**

Znak Univerziteta otiskuje se na podnescima Univerziteta koji se stavljaju u pravni promet, a u svrhu prepoznavanja akademske pripadnosti.

Znak Univerziteta koristi se i na pojedinim ispravama, kao što su diploma, dodatak diplomi o završenim ciklusima studija koje izdaje Univerzitet, a na način i u skladu sa Pravilnikom o formi i grafičkim standardima diplome i dodatka diplome.

Znak Univerziteta koristi se i na svim štampanim stvarima koje Univerzitet koristi u prigodnim manifestacijama i svečanostima, te na obrascima o dodijeljenim priznanjima i slično.

#### **III SADRŽAJ I IZGLED ZNAKA ORGANIZACIONIH JEDINICA**

##### **Član 6.**

Organizacione jedinice Univerziteta mogu imati svoj znak.

Znak organizacione jedinice ne može biti većeg prečnika od znaka Univerziteta, a u svom sadržaju obavezno sadrži naziv i godinu osnivanja Univerziteta i to u vanjskom koncentričnom krugu .

Organizacione jedinice i njihovi podorganizacioni dijelovi ne mogu u pravnom prometu uz ovaj znak koristiti druge simbole.

#### Član 7.

Izgled znaka organizacione jedinice utvrđuje Senat Univerziteta, na prijedlog Naučno-nastavnog/Umjetničko-nastavnog vijeća fakulteta/Akademije, odnosno direktora Studentskog centra.

Prijedlog izgleda znaka organizacione jedinice može se utvrđivati na način i u postupku utvrđenim članom 2. stav 4. ovog Pravilnika.

### **IV ZASTAVA UNIVERZITETA**

#### Član 8.

Univerzitet ima zastavu, kao svoj simbol.

Zastava Univerziteta je dimenzija 1 x 2 m, bijele boje, sa znakom Univerziteta na sredini.

#### Član 9.

Zastava Univerziteta ističe se ispred objekta sjedišta Univerziteta, a u prigodnim svečanostima može se isticati i ispred objekata njegovih organizacionih jedinica.

#### Član 10.

Osim simbola utvrđenih prethodnim članovima ovog Pravilnika Univerzitet, uz prethodno odobrenje Senata, može kreirati i koristiti i druge adekvatne simbole privremeno, za vrijeme dok traju potrebe za istim.

### **PRELAZNE I ZAVRŠNE ODREDBE**

#### Član 11.

Organizacione jedinice Univerziteta koje imaju i koriste u pravnom prometu svoj znak, u obavezi su prilagoditi izgled i sadržaj istog, najkasnije u roku od 6 mjeseci od dana stupanja na snagu ovog Pravilnika.

#### Član 12.

Ovaj Pravilnik stupa na snagu danom donošenja.

UNIVERZITET U TUZLI

Broj: 03-11666-2.2/11

Tuzla, 28.12.2011. godine

**PREDSJEDNIK SENATA**

**Prof.dr.sc Enver Halilović**